

摘藻堂四庫全書薈要

史部

欽定四庫全書薈要卷八千二百四十

史部

欽定大清會典卷十一

戶部

權量

度量衡受法於律黃鐘繫黍漢志僅存其說

聖祖仁皇帝考古法以制度而量與權衡準焉

皇帝參古今尺度制為嘉量而權衡攸同

聖明相繼

作述兼隆誠度越前規式昭萬禩矣





度

橫黍度

古尺

縱黍度

今尺




以絁黍定分寸之率一黍之廣度為一分橫絁  
十黍得古尺一寸一黍之縱度為一分直絁十  
黍得今尺一寸今尺八寸一分當古尺十寸今  
尺七寸二分九釐當古尺九寸即黃鐘之長十  
寸為尺十尺為丈十丈為引總以尺該之工部  
製造頒直省布政使司通頒所屬以準度營造

權

以寸法定輕重之率鑄金為方上下四方均一

寸各按其質求之赤金方寸得十有六兩八錢  
白金方寸得九兩紅銅方寸得七兩五錢黃銅  
方寸得六兩八錢黑鉛方寸得九兩九錢三分  
倭鉛方寸得六兩輕重之準既得迺隨大小之  
用制以為推其形圓其制以黃銅由部定式工  
部鑄造頒直省布政使司通頒所屬以出納邦  
賦



[illegible][illegible][illegible][illegible]






量

以寸法定容積之率


升方積三十一寸六百分面底方四寸深一寸  
九分七釐五毫



斗方積三百一十六寸面底方八寸深四寸九  
分三釐七毫五絲



斛方積一千五百八十寸口方六寸六分底方  
一尺六寸深一尺一寸七分




兩斛為石容積三千一百六十寸各得容量之  
準斛之制由部定式工部鑄造以鐵頒倉場侍  
郎漕運總督直省布政使司布政使司如式造  
木斛通頒所屬以出納倉糧

凡官司所掌營造官物收支糧賦貨賦下逮市  
廛里巷商民日用度量權衡皆如式較定有違  
制私造增減成憲者皆論如律



嘉量圓制

東漢嘉量度數中令太簇仿  
其式用今律度合黃鍾焉



斛積八百六十寸九百三十四分四百二十釐

容十斗深七寸二分九釐累一百十有八寸

九分八十釐徑一尺二寸二分六釐二毫

斗積八十六寸九十三分四百四十二釐容十

升深七分二釐九毫累一百十有八寸九分

八十釐徑一尺二寸二分六釐二毫

升積八千六百有九分三百四十四釐二百毫

容十合深一寸八分二釐二毫五絲累四百

七十二分三十九釐二十毫徑二寸四分五釐二毫

合積八百六十分九百三十四釐四百二十毫  
容二龠深一寸有九釐六毫冪七十八分五  
十三釐九十八毫徑一寸


龠積容深為合之半冪徑同

按工部營造尺為縱系百黍之度營造尺九之  
九即律尺為橫系百黍之度



嘉量方制

唐太宗時張文叔造嘉量形  
方亦仿其制而用今律度



斛積八百六十寸九百三十四分四百二十釐  
容十斗深七寸二分九釐罽一百十有八寸  
九分八十釐方一尺有八分六釐七毫

斗積八十六寸九十三分四百四十二釐容十  
升深七分二釐九毫罽一百十有八寸九分  
八十釐方一尺有八分六釐七毫

升積八千六百有九分三百四十四釐二百毫  
容十合深一寸八分二釐二毫五絲罽四百

七十二分三十九釐二十毫方二寸一分七釐三毫

合積八百六十分九百三十四釐四百二十毫  
容二龠深八分六釐有九絲罽八分方一寸  
龠積容深為合之半罽方同

按工部營造尺為縱糸百黍之度營造尺九之  
九即律尺為橫糸百黍之度

右嘉量圓方各一皆範銅塗金上斛下斗左耳

為升右耳為合龠其重二鈞聲中黃鐘之宮掌  
以工部陳之

殿廷垂憲於億萬斯年

欽定大清會典卷十一



欽定四庫全書薈要卷八千二百四十一

史部

欽定大清會典卷十二

戶部

庫藏

凡庫藏之隸於部者有三一曰銀庫直省田賦  
及關市鹽茶諸稅課歲輸至京者咸入焉二曰  
段疋庫織造縑帛紗縠歲輸至部者咸入焉三  
曰顏料庫銅錫鉛鐵丹青赭綠香楮茶蠟之屬

咸入焉

凡三庫之政令

特簡大臣綜理之其財用出入之數月有要歲有會  
皆覈實以

聞

凡三庫所藏各異其物其出入品式各異其宜  
皆設郎中員外郎分理之司庫大使屬焉主事  
一人兼掌三庫文案凡財賄之受藏於庫及取

用於庫者皆書其數歲終迺執其總會三庫羣吏之籍而參考之以待奏銷

凡三庫司官各部院於所屬諸司遴選賢能者送部引

見補用閔三年更選以代筆帖式庫大使如之

凡直省賦稅輸部者歲有常數覈數無闕迺移銀庫準部定權衡受之如啟櫝驗封有作弊及數不實者論

凡歲用縑帛紗縠由織造官

江寧蘇州杭州各一人

市絲

民間織染輸部部移段足庫受之其上供

御服者則輸於

內府歲所需財用皆給公帑具冊達部以待稽覈  
有造作不如法者論

凡器用所需百物之良各有土產直省有司歲  
支正賦市自民間大者疏

聞下部小者以冊達部部覈其數移顏料庫受之採

擇不精良者論

凡

朝廷經費官司庶物之待給者歲有常數其財用取  
諸三庫所司籍其數移部部稽其籍相符迺牒  
諸庫主事主事受其牒而書之頒之承用之府  
覈實而發之

凡直省布政使司糧鹽驛傳道皆有庫庫設大  
使一人其他道府州縣庫以主藏吏司其出納

典守不慎或積久滋弊者官吏並論如法

倉庾

凡

京師倉十有三旗三營兵食官軍牧馬豆貯焉  
通州倉二王公百官俸廩米貯焉又專隸本部  
倉一供

內府奉祭祀待外藩屬國廩餼之米牧馬之豆咸  
貯焉倉各分廩每廩貯米以萬石為率

正米萬石連耗

作數出陳納新各依其序以為常法

凡倉場之政掌於總督侍郎承以坐糧廳分司於大通橋監督及各倉監督坐糧廳簡用科道部郎二年更代各倉監督簡用內閣中書部院監寺屬官三年更代均由部引

見差委大通橋監督由總督倉場侍郎於各監督內簡選引

見調補

凡稽察倉儲京倉以都統副都統通倉以通永  
道通州副將專稽倉有滲漏米有盜竊者移倉  
場治之歲差滿漢御史通稽一歲之內收漕發  
米釐剔弊端閱四年

特命王公大臣徧履諸倉察覈以重

天庾儲備

凡催船各省糧船既過天津抵通交兌以及空  
船回南皆總督倉場侍郎董率沿河文武官弁



催行毋許停泊

凡兌糧各省糧船既抵通州正兌漕糧於石壩交兌改兌漕糧於土壩交兌坐糧廳察米色皆純呈驗於總督倉場侍郎迺按數起斛白糧交兌亦如之運軍有虧欠者以應給回空食米抵補不足則發本籍責追次年附運交倉

凡轉運正兌漕糧由石壩入通惠河經普濟平下平上慶豐四牐每牐換船至大通橋監督掣

驗無闕迺分水陸運交京倉收貯改兌漕糧由土壩裏河至通州城南換陸運交通倉收貯其起斛掣驗換車皆有號房暫貯過壩由牕上岸下船皆雇夫肩負石壩至京倉水運以經紀陸運以車戶土壩至通倉水陸運皆以車戶承領各給運價有差白糧之運京運通亦如之

凡收糧正兌漕糧以加二五斛改兌漕糧以加

一七斛

詳見漕運

白糧以稱重百六十斤為一石連

正耗同收以杜胥役侵漁之弊其轉運到倉總督倉場侍郎給以印單京倉期十日通倉期七日畢收如逾期留難及重斛有需索者稽察御史叅奏依律罪之

凡發米王公百官俸廩以春秋仲月八旗兵食以四季每季按旗先後分月關支開倉時部委司官二人各旗均委叅領一人與監督互相糾察如攬和沙土通賄舞弊越陳廩發新廩及斛

有重輕者稽察御史皆劾論如法

凡隨糧耗米

詳見漕運

除牘壩盤折運軍回空食米

入倉閱月至三年按月計耗有差其餘統入正米支銷

凡隨糧經費

詳見漕運

各省皆先漕齎解倉場發貯

通濟庫坐糧廳司其出納歲發京通各倉水陸運價牘壩負運北河濬淺諸費運軍簞夫羨餘起駁等銀咸取給焉

凡倉糧收支庫帑存發總督倉場侍郎歲籍其數具疏以

聞由部覆覈奏銷

凡直省常平倉皆州縣官專司之社倉義倉建自商民官為經理省會重地大府雄鎮兵精所貯屬之道府其他水陸四達之衝設倉以便轉運提鎮大標沿海沿邊距省遙遠偏僻汛防各設營倉積糧以備藉糶皆隨時制宜裕不匱之

儲永為軍民之利

積貯

國家循古制設常平倉隨時糴穀用資振貸豐年  
則勸民出升斗以益之厥後戶口殷阜迺出庫  
藏市糴間或截漕運貯各州縣衛分上中下等  
以三萬二萬萬六千石為差承平歲久生齒日  
繁益需委積聽所在俊秀納粟入監視其土地  
廣狹山川險易物產盛衰酌舊額而更定之直

隸積穀二百十有五萬四千五百二十四石

盛京百二十萬石山東二百九十五萬九千三百  
八十六石山西百三十一萬五千八百三十七  
石河南二百三十一萬九百九十九石江蘇百  
五十二萬八千石安徽百八十八萬四千石江  
西百三十七萬七百十有三石福建二百五十  
六萬六千四百四十九石浙江二百八十萬石  
湖北五十二萬九百三十五石湖南七十萬二

千百三十三石陝西二百七十三萬三千有十  
石甘肅三百二十八萬石四川百有二萬九千  
八百石廣東二百九十五萬三千六百六十一  
石廣西百二十七萬四千三百七十八石雲南  
七十萬一千五百石貴州五十萬七千有十石  
凡三千三百七十九萬二千三百石有奇

凡常平積貯之法必相風土之寒暄燥濕東南  
西北異方稻麥粟米異宜江南江西福建浙江



湖廣四川廣東廣西雲南貴州宜稻宜粟直隸  
盛京山東山西河南陝西或以米或以雜糧貯米  
者半穀之數每歲出陳易新土高燥者以十之  
七存倉十之三平糶卑濕則存半糶半各因時  
地而變通之以均歲之豐歉督撫於歲終覈實  
奏銷以冊送部稽察如有虧闕先請動帑買補  
將虧空官題叅照例治罪限年追賠

凡買補之法春夏出穀秋冬還倉依市價於本

地產穀之區或鄰邑價平處買運如數還倉遇  
歲歉市貴則展至次年若倉庾闕乏亟需補足  
者申明上官準於價賤之州縣和糴抑富民派  
保甲者劾之

凡順成之方本省倉庾既足督撫具疏請

旨出庫藏委官收糴毋致價賤傷農若有多為麴蘖  
以糜穀者禁之

凡直省倉穀有在常平額外者如河南漕穀倉

江南江寧省倉宗明倉福建臺灣備貯倉浙江  
永濟倉玉環同知倉廣東廣糧通判倉或備本  
省急需或備鄰省協濟或因山海遠僻藉以充  
賑備糴皆飭所在官按其額數時其出納以佐  
常平之所不及歲終彙入倉糧奏銷冊內申報  
督撫送部察覈

凡民間收穫時隨其所贏聽出粟麥建倉貯之  
以備鄉里借貸曰社倉公舉殷實有行誼者一

人為社長能書者一人副之共領其事按保甲  
印牌有習業而貧者春夏貸米於倉秋冬大熟  
加一計息以償中歲則捐其息之半下歲免息  
社長社副執簿檢校歲以穀數呈官經理出納  
惟民所便官不得以法繩之豐年勸捐社穀在  
順民情禁吏抑派有好義能捐十石至百石以  
上者旌獎有差社長社副經理有方者按年給  
獎仍以息穀酌酬勞勩

凡紳士捐穀以待賑貸曰義倉各就市鎮鄉村  
建廩春頒秋斂取贏散滯獎善酬勞悉依社倉  
規條惟頒斂之期出入之籍時呈所在官覈之  
所在官於去任蒞任時授受簿籍察其虛實以  
行懲勸

凡直省營戍沿邊沿海及去省遙遠者設倉貯  
穀曰營倉以營弁經理遇青黃不接之時或借  
或糶以接濟軍士如有那移虧闕照常平積穀

例題參追賠



欽定大清會典卷十二



總校官候補中書臣吳紹潔

校對官編修臣莫瞻榮

膳錄監生臣平達

膳錄監生臣沈錫爵

欽定四庫全書叢要

史部

欽定大清會典卷十九

三十五






欽定四庫全書薈要卷八千二百四十二

史部

欽定大清會典卷十三

戶部

漕運



自元濬會通河明導汶水北會漳衛而東北之  
運道以通

國朝南鑿桃宿之道開中運河以避黃河之險於  
是糧艘由淮浦渡河徑趨山東達

京師皆銜尾無阻刑弊剔姦以肅漕政垂萬世之利賴於無窮焉

凡歲漕

京師者八省其漕有五等曰正兌米入京倉以待八旗三營兵食之用以乾隆十八年奏銷冊計之山東十有五萬七千九百九十四石河南八萬一千六百二十八石江蘇百有七萬六千三百九十三石安徽三十萬七千十有六石江西

三十五萬千五百有三石浙江五十五萬九百  
四十七石湖北九萬四千五百七十四石湖南  
九萬五千五百三十一石各有奇○曰改兌米  
入通州倉以待王公百官俸廩之用山東六萬  
九千四百七十三石河南三萬九千九百十有  
一石江蘇九萬二千四十四石安徽十有一萬  
八千八百四十五石江西十有五萬千八百五  
十石浙江二萬九千三百六十五石各有奇○

曰白糧分入京通倉以供內府光祿寺以待王公百官各國貢使廩餼之用江蘇六萬九千四百四十七石浙江三萬五百五十三石各有奇○曰粳麥入京倉以供內府之用河南正兌五千八十六石改兌三千三十三石各有奇○曰黑豆入京倉以待八旗官軍及賓館牧馬之用山東正兌四萬五百有四石改兌萬六千五百石河南正兌三萬二千六百七十四石改兌萬

五千五百八十八石各有奇

凡漕糧改折曰永折米徵銀解部山東河南歲折徵各七萬石江蘇十萬六千四百九十二石

安徽七萬五千九百六十一石湖北三萬二千

五百二十石湖南五千二百十有二石

每石連耗折銀

五錢至八錢

○曰改折灰石米徵銀解部以待工部

灰石之用江蘇歲折徵二萬一千一百十有六

石浙江萬三千三百二十三石各有奇

每石連耗折銀

一兩六錢八分

凡漕糧經費曰正耗各省正兌米每石二五二

五升後仿此加耗改兌米一七加耗以備通州五牖

運耗貯倉折耗及運軍回船食米之費○曰輕

齋正兌米山東河南每石一六加耗江蘇安徽

二六江西浙江湖北湖南三六改兌米江蘇安

徽江西浙江每石二升加耗山東河南改兌米不徵輕齋湖南北

無改兌米均折銀徵解倉場通濟庫漕船至通計運

道遠近每船給羨餘銀又按到通米數每石給  
簷夫銀各有差

惟山東河南道近不給簷夫銀

○曰船耗除山

東河南及江蘇徐州府屬之銅豐沛蕭碭漕船

不給耗餘船正兌米每石一五及五升加耗改

兌米二三一三及八升加耗各有差以給運軍

沿途耗折○曰席木各省正兌改兌米每二石

徵葦席一以十分之一七隨船解通為倉庾苦

蓋之用江西湖北湖南每正兌米二千石徵楞

木一松版九以十分之五解通為倉庾鋪墊之

用餘均折銀徵解通濟庫浙江及江蘇常鎮安

寧池太等府太倉州徵版木如之皆折徵解庫

○曰行糧月糧各省運弁運軍凡出運之年各

支行糧二石四斗至三石有差運軍月糧八石

九斗至十有二石有差或折銀徵給或銀米各

半各因其地之宜山東蘇松江安糧道所屬半

於領運時發給半徵解水次六倉山東則臨清



德州江蘇安徽則江寧鳳陽淮安徐州沿途發給○曰贈貼明代漕糧繫軍民交兌民受需索之苦

國初改為官收官兌因酌定贈貼官為支給隨其方俗各省異名山東河南漕船每運米百石給潤耗銀五兩米五石江安糧道所屬給漕贈如之蘇松糧道所屬米同銀倍浙江給漕截銀三十四兩有奇江西給貼運銀三兩米三石副耗

米十有三石湖北湖南給貼運米二十石皆隨漕科徵

凡白糧經費江蘇每石正耗三斗浙江四斗五斗以備入倉耗折及運軍沿塗折耗之費江蘇每船給束包人夫工食銀十有四兩每運米百石給漕截銀三十四兩食米七石各有奇又盤耗米二十石浙江給漕截銀如江蘇食米三十石有奇運弁行糧運軍行糧月糧與漕糧同

皆隨糧科徵

凡漕糧轉輸薊州易州以待

陵寢官兵俸餉之用薊州酌撥漕糧四萬六千八百七

十石白糧千三百十有五石自天津府轉輸易

州酌撥漕糧萬九千一百八十七石白糧四百

五十石自白溝河轉輸

均於各省應輸京通倉米內撥運後水師駐防

俸餉

同

凡漕糧歲畱天津府滄州以待水師及駐防官

兵俸餉之用糧船過滄畱漕糧萬一千七百十有九石過天津畱四萬五千石各有奇

凡漕糧截畱或一方偶遇偏災截漕轉運以備拯荒平糶之用或酌畱直省分貯府縣每歲出陳易新以為經久不匱之儲皆隨時調劑不限常數

凡蠲免田賦之歲漕糧以

天庾儲備徵輸如常若被災府縣完納維艱令督

撫確勘情形酌應緩應蠲之數具疏請

旨

凡漕船六千九百六十有九每歲出運者直隸

三十七

均協運河南

山東九百七十五

運軍自備者三百十有一

協運河南二百六十八

蘇松糧道所屬五百八十九江安

糧道所屬三千八十四

協運河南百二十五協運蘇松千九百九十七

內運白糧者百三十六於通省漕船內簡調三

年踐更江西七百有八浙江千二百十有四內

專運白糧者六十三湖北百八十湖南百八十  
二〇成造漕船以長九丈載米四百石為度江  
西湖北湖南加長一丈每歲修理出運十年改  
造如成造不堅固不及十年損壞者責運軍補  
造督運官弁皆劾論○遇運河水涸須分截過  
淺回南阻凍不能依期歸次須以別船代運赴  
通均許和雇民船官為定價毋許運弁抑派及  
船戶居竒高索

凡漕政掌於漕運總督各省以糧儲道專司之  
各府以管糧同知通判分治之徵收兌運由州  
縣官總其成於巡撫布政使司運道疏濬牘壩  
啟閉自江北至淮自淮北至天津則河道總督  
任之天津以北倉場侍郎經理之歲以給事中  
御史分巡通州而下天津濟寧淮安至揚子江  
口以稽察運道剔除漕弊

凡有漕之省隨漕之多寡以建衛每衛守備一

人以治衛軍酌漕船之多寡以分幫每幫領運千總二人分年番休武舉一人隨幫効力每船領運衛軍十人每運選用一人由守備舉報濫舉不慎者論每軍出運副一人隨運以本軍子弟充之水手十人由運軍雇募令十船互保有滋事不法者連坐

凡徵糧以十月朔啟徵米取乾潔不分赤白兼收白糧則官為春治民輸春耗有差立聯三票



稽覈如制

詳見  
田賦

凡兌運以漕船到次之日為始至十一月終兌  
畢以府同知通判為監兌官總漕按船數米數  
刊發全單開明耗贈糧道依全單之數分刊號  
單頒之州縣每單兌米百石一單兌足令運弁  
注明收數一船兌足即發水程開行

凡察驗米色監兌官以米一石包封為式糧道  
親驗鈐印至淮總漕拆封掣驗通船米如式仍

鈐封至通倉場侍郎拆驗亦如之其包封米作  
正交倉

凡漕運行程重運北上順流日行四十里逆流  
日行二十里巡撫給以水程所過沿河州縣入  
境出境皆注日時至淮總漕察驗無誤換給水  
程所過州縣注日時至通州倉場侍郎察驗如  
之空船南下順流日行五十里逆流日行三十  
里倉場侍郎給發水程所過州縣注日時至淮

總漕察驗如北上時先後還次不得過十一月  
巡撫察驗亦如之惟經涉河淮江湖重險不立  
程期守牖候風阻凍均準注限若內河無阻有  
違行程者領運官弁及運軍皆論如法

凡通漕限期山東河南以次年三月初一日到  
通江蘇安徽大江以北本年十二月杪過淮次  
年四月初一日到通大江以南次年正月杪過

淮

松江府所屬  
寬限十日

五月初一日到通浙江湖北次

年二月杪過淮六月初一日到通江西湖南次年三月初十日過淮六月初一日到通受兌開行由巡撫疏報過淮由漕運總督經皂河由江南河道總督過濟寧逾臨清由河東河道總督皆具疏專達天津以北倉場侍郎五日一奏報如過淮遲延責在巡撫抵津遲延責在漕河三督及所屬沿河文武官皆按期劾論

凡督運山東河南漕船兌運已畢糧道簡委府

通判管押赴通江淮以南則監兌官親送至淮  
候總漕察驗畢或即委監兌官或別委通判以  
行過淮已畢總漕隨運北上率所屬官弁相視  
運道險易調度全漕察不用命者俾舳艫相接  
畢渡天津迺入

覲述職以重官守各省通判仍竝漕船卸載管押回  
南迺既厥事

凡催漕道府董率州縣官於入境時按程催行

毋許停泊出境廼止沿河營汛鎮將董率汛弁  
催行亦如之催行不力致有羈遲者專催督催  
各官弁劾論有差

凡屯田各省多寡不一

詳見  
田賦

皆按漕船均分給

領運之軍耕以濟運其不能自耕者或官召民  
佃徵租贍軍或民賃軍田軍自取息有爭訟則  
州縣官治之私相質買者與受皆梟

凡優卹運軍每船北上許隨載土產物百石頭

工舵工水手共二十六石回空隨載梨棗六十石經過關津免其輸稅過淮如期抵通交糧無闕總漕酌加獎賞二十年領運無過給九品冠帶榮身

凡漕運禁令州縣徵糧毋許吏役浮加斛面抑派雜費府倖監兌無許弁軍需索陋規私收折色重運北上空船南回毋許運軍水手盜賣漕米滲水和沙或私帶客貨冒渡關津或擾害民

船強橫生事或行船越次以避稽察或中塗并載脫船私歸運弁毋許擅離漕船催運弁兵毋許索運軍土物違者皆論如法

凡漕運考成漕糧白糧並隨糧經費皆限本年徵足糧道造具四柱清冊達總漕疏報徵收官以經徵督徵之數作十分考成如有未完經徵之州縣衛所自不及一分至五分督徵之道府自一分至六分巡撫自一分至八分論劾有差



叅後州縣衛所限一年道府限一年有半巡撫  
限二年逾限不完不復作分數照原叅分數叅  
處巡撫以完欠支存之數隨奏銷疏報轉運之  
官抵通交倉糧數無闕總漕糧道及押運領運  
官弁議敘有差如有未完按分數叅處勒限責  
償逾限不完者皆論如法

凡漕船偶遭風浪在河淮江湖失事者如船糧  
漂沒無存地方官勘實報總漕題豁若內河遇

風收泊不慎或不戒於火致船與糧有失者皆  
不準豁免領運押運並地方文武官弁劾論如  
法

欽定大清會典卷十三

欽定四庫全書薈要卷八千二百四十三

史部

欽定大清會典卷十四

戶部

錢法

凡鼓鑄緡錢以資

國用農末之交利百物之流轉於是乎權衡焉過輕則民多私鑄過重則民利盜燬權輕重之中以重二銖八十有八黍為率鎔赤金和以白黑

鉛及錫依古九府圜法制之徑八分輪郭外周  
中作字兩面皆陽起清文曰寶泉漢文著年號  
左右列通寶二字以頒行天下

凡

京師鼓鑄統設二局其隸於部者曰寶泉局歲鑄

錢六十一卯

以萬二千四百八十緡為卯

得錢七十六萬千

二百八十緡遇閏加鑄四卯得錢四萬九千九

百二十緡

凡寶泉局政令掌於滿漢右侍郎其滿漢司官  
由部遴選保舉引

見簡用二年更代大使由本部筆帖式選委咨吏部  
注冊五年更代勤謹無過者任滿以應升官用  
不稱者劾

凡寶泉局出錢以兵餉為大兵餉十分以錢一  
分或二分配銀給發皆視局錢之盈縮以定其  
增減之數

凡銅之良者產於雲南召商開採歲輸

京師五百七十萬四千斤有奇分為六運承運官  
正副二人以府貳牧令為正丞倅為副以九十  
日為一運由尋甸東川水陸兼運至四川之永  
寧下三峽沿於江漢經湖南北江西安徽江蘇  
達於運糧河由運糧河達於京自起運至京以  
十有四月為期運舟由有司和雇舟不堅固致  
損敗者經理之有司論其觸險沉溺者所在有

司責令雇水手採取銅有遺失者責償其輸納  
於部也必辨色之高下以定其數色惡數不足  
者承運之官論持衡不平致有輕重低昂者主  
藏之吏論

凡商賈有挾重貲願航海市銅者官給符為信  
聽其出洋往市於東南日本諸夷舟回司關者  
按時直收之以供官用有餘則任其售於市肆  
以便民用

凡白鉛黑鉛產於湖南貴州亦召商開採歲輸  
京師白鉛三百八十四萬千九百十有四斤黑鉛  
七十萬五百七十一斤分為上下二運上運起  
自四月至十月抵京下運起自十月至次年三  
月抵京錫之良者產於南洋諸夷國番舶之以  
時至者由廣東和買歲輸

京師二十一萬千七百十有二斤均以佐雜官承  
運



凡運銅及鉛錫皆有定限計日到京逾期者論經行之地所在有司督催出境毋許淹畱法與督漕同催行不力者糾劾

凡直省奏準開鑄者直隸山西江蘇江西福建浙江湖北湖南陝西四川廣東廣西雲南貴州十有四省惟雲南即山採銅其他或收本境廢銅或買雲南餘銅各隨其地之宜作之泉布以利民用一面鑄清文寶字並本省一字其餘輕

重制度咸如京局

凡錢禁莫重於盜燬民有犯者立正典刑其次  
私鑄其次剪邊取鎔其次用古廢錢其次私行  
小錢犯者悉論如法中外文武官失察者皆劾  
若夫轉移出入上操其權交易流通下收其利  
有藏積私家居奇病民者並治之

欽定大清會典卷十四

欽定四庫全書薈要卷八千二百四十四

史部

欽定大清會典卷十五

戶部

鹽法

凡權鹽之法順物土之宜而理之或府海以收  
其利或產於池或汲諸井而成之皆通商轉運  
以便民食收其稅以供

國用

凡

盛京沿海之地皆民自煮鹽市易奉天府錦州府  
鹽場二十皆以州縣佐貳官司其場務不權不  
幾統隸於奉天府尹

凡直省沿海及有池井之地聽民間地為場置  
竈開畦為鹽而售之商或官出帑收鹽授之商  
而行之以鹽課大使掌其場之政令與場地之  
徵治其交易審其權衡而平準之日稽其所出

之數以杜私販之源運同運判分司其地而糾  
察之○長蘆都轉運鹽使司運使所屬分司天  
津運同治場八滄州運判治場二山東都轉運  
鹽使司運使所屬分司濱樂運同膠萊運判各  
治場五每場設大使統隸於巡視長蘆鹽政○  
兩淮都轉運鹽使司運使所屬分司泰州運判  
治場十有二通州運判治場十淮安運判治場  
三每場設大使統隸於巡視兩淮鹽政○河東

都轉運鹽使司運使所屬中分司運同治山西

解州安邑縣鹽池一場三每場設大使陝西甘

肅定邊大池一設鹽池大使統隸於巡視河東

鹽政其靈州小池一設鹽池大使別隸於甘肅

巡撫

以下督撫兼鹽政同

○兩浙驛鹽道所屬分司寧紹

運副治場二十嘉松運判治場十有一每場設

大使統隸於浙江巡撫兼巡視鹽政○福建鹽

法道所屬鹽場十有三在內地者十有一其八

場委簡發試用官餘委知縣及首領佐貳官司

其場務在臺灣者二以知府兼理之統隸於閩

浙總督○廣東都轉運鹽使司運使所屬分司

惠潮汀贛運同治場十有三每場設大使統隸

於兩廣總督○四川驛鹽道所屬鹽井七千七

百有三鹽井大使十有二人統隸於四川總督

○雲南驛鹽道所屬鹽課提舉司三分轄鹽井

十有六鹽井大使十有一人統隸於雲南巡撫

凡行鹽以商商有世業行有地限其轉輸於各省者先納課而後領運各按應行之地隨時價而銷售之

凡產鹽之省運使鹽道察場民之生計與商之行息而平其鹽價行鹽之省由驛鹽道或分巡道知府兼理之其水陸挽運必計其道里時其往來平其貴賤俾商無滯引民免澹食以聽於鹽政鹽政掌弊羣吏糾其徵收督徵之不如法



者以時審其價而酌劑之凡鹽賦之奏課與鹽法之宜更者以

聞總督巡撫兼鹽政者如之

凡行鹽符信由部給引鹽政受而布之商其受鹽於場掣鹽於批驗所轉運於應行府州縣皆按引以知其數輸賦於運使鹽道上計於鹽政皆積引以定其算歲周則收已行之引截角送部以待稽覈更頒新引

凡鹽課視每歲應行引數以定課最以乾隆十八年奏銷冊計之直省共行銷六百三十八萬四千二百三十一引課入五百五十六萬五百四十兩有奇○長蘆鹽行直隸及河南開封彰德衛輝陳州懷慶南陽府屬之舞陽許州屬之臨潁鄆城長葛引九十六萬六千四十有六課入六十萬三百九十四兩有奇山東鹽行本省及河南歸德府江南宿州徐州府屬之銅豐沛

蕭碭正引五十五萬票引十有七萬千七百四十課入二十四萬五千六百八十八兩有奇○兩淮鹽行江南之江寧安慶鳳陽廬州池州太平寧國潁州淮安揚州各府六安滁和泗通海各州徐屬之邳宿睢寧三州縣江西之南昌饒州九江南康建昌撫州臨江吉安瑞州袁州河南之汝寧光各府州及湖北湖南引百六十八萬五千四百九十有二課入二百十有七萬九

千二百六十四兩有奇○河東鹽行山西及河南之南陽河南陝汝等府州許州屬之襄城陝西之西安鳳翔同州邠乾商興安等府州引四十二萬六千九百四十有七課入四十二萬九千三百八十二兩有奇陝甘鹽行漢中延安鄜綏德各府州引三萬九千四百課入八千九百八十兩有奇行蘭州鞏昌平涼慶陽寧夏秦階各府州靈州洮州等衛引七萬二千六百八十

有八課入二萬四百十有六兩有奇○兩浙鹽  
行本省及江南之蘇州松江常州鎮江徽州太  
倉廣德江西之廣信等府州正引七十萬四千  
六百九十有八票引十萬六百九十有八課入  
七十三萬七千七百五兩有奇○福建鹽行本  
省引九十四萬六千四百八十有五課入三十  
九萬七千三百四十二兩有奇○廣東鹽行本  
省及江西之南安贛州福建之汀州湖南之桂

陽柳各府州貴州之古州引五十三萬八千五

百二十有二課入四十六萬八千七百八十七

兩有奇行廣西引六萬五千六百有十課入十

有一萬三千七百八十二兩有奇

東課六萬六千二百六十

八兩西稅四萬七千五百十有四兩各有奇

四川鹽行本省及湖

北之施南府宜昌府屬之鶴峯長樂二縣雲南

之東川昭通二府曲靖府屬之南寧霑益平彝

三縣引十有一萬五千百八十有五課入八萬

九千五百三十六兩有奇○雲南鹽行本省以  
道遠不頒引按井給票課入二十六萬一千六  
百四十三兩有奇○貴州各府近湖廣者食淮  
鹽近四川者食川鹽不通商不頒引小民就近  
負販而輸稅於官布政使糧驛道兼理之統隸  
於貴州巡撫課入七千六百十有五兩有奇

凡竈地之徵視年之上下歲登盡入其稅給由  
單書其應入之數令如數輸納歲終會而上之

部荒則辨其等其宜蠲宜緩法如田賦

凡商之徵責之運使鹽道引之行責之州縣官  
課登引疏通者予叙課有逋負引有稽滯者劾  
議各計其分數而殿最之

凡無引而私行及越禁私販者有禁民或犯令  
由地方文武官緝治之疎縱者論若老弱孤獨  
擔負四十斤以下者免幾

欽定大清會典卷十五



欽定四庫全書舊要卷八千二百四十五

史部

欽定大清會典卷十六

戶部

關稅

凡天下水陸衝會舟車之所輻輳商旅之所聚集設關置尹掌其治禁以安行旅以通貨賄爰繫之稅以便詞幾以佐

國家經費

凡直省關稅以乾隆十八年奏銷冊計之稅入  
四百三十二萬四千有五兩有奇

京師崇文門稅入十萬二千百七十五兩左翼右

翼均萬兩通州萬二千六百四十七兩直隸天

津關七萬四千五百六十九兩山海關三萬二

千二百兩龍泉紫荆獨石等關口四千三百有

六兩張家口二萬兩殺虎口萬六千九百十有

九兩

內工關銀七千六百四十兩稅解本部考覈由工部凡工關同

潘桃口七

千六百四十五兩古北口二千六百六十九兩

胡納胡河二千三十兩輝發莫欽二百八十兩

白都訥二百有七兩均工關奉天四千八十八兩

中江三千二百九十四兩山東臨清關四萬三

千三百有五兩內工關四千五百七十二兩山西武元城千

二百三十一兩工關江蘇海關七萬七千五百有

九兩許墅關四十九萬五千二百二十六兩淮

安關三十二萬五千一百六十三兩內宿遷工關四萬八

千八百八十四兩  
繫淮安關兼管

揚州關二十萬一千九百有

八兩西新關十有二萬九千九百十有五兩

內龍

江工關五萬七千六百  
有七兩繫西新關兼管

安徽鳳陽關二十八萬

七千九百二十兩蕪湖關三十一萬六千八百

二十五兩

內工關七萬一百四十六兩

江西九江關三十五

萬四千二百三十四兩贛關九萬六千八百十二

兩福建海關三十一萬四千四百四十八兩閩

安關二萬三千三百六十五兩浙江海關八萬

七千六百五十四兩北新關二十一萬六千五

百六十二兩

內南新工關三萬二百四十  
十七兩繫北新關兼管

湖北武

昌廠五萬三千九百六十七兩荆關四萬一千

六百十有七兩

工關

湖南辰關萬六千四百二十

二兩

工關

四川夔關

舊名  
渝關

十有六萬三千一百十

有四兩

內工關  
五千兩

打箭鑪一萬九千六百七十五

兩廣東海關五十一萬五千一百八十八兩太

平關十有三萬七千二百九十七兩廣西梧廠

六萬三千有八兩尋廠四萬五千八百二十兩  
各有奇

凡直省關務或差京官監督或以督撫總理或  
以將軍織造鹽政兼理京差由部疏請歲周更  
代督撫委所屬道府專司之具疏以

聞

凡貨財之經過關津者必行商大賈挾貲貨殖  
以牟利者迺徵之物有精麤直有貴賤利有厚

薄各按其時地以定應徵之數部設科條頒於  
各關刊之木榜俾商賈周知而吏不能欺其有  
匿應稅之物者論如法至小民日用所需擔負  
奇零之物皆不在徵權之條

凡海舶貿易外洋者給之照以稽察之其出洋  
歸港皆憑照為信因按其照稅之有藏匿姦匪  
私帶違禁之物者論如法

凡內江內河賃載客貨之船經遼曠閱險阻皆

給之照抵關投驗以辨姦良各關稅貨稅船各隨其地之宜有私冒越渡者論如法

凡關津之徵每歲豫作空白冊申部部於冊內編定年月鈐印發還一曰親填簿商賈到關輸稅令揭其貨物按次月日親書於冊不得假手吏胥一曰循環簿一畱署一發關據商賈所書貨物分析其應稅之數亦按次月日備書於冊循發則環畱環發則循畱司關者隨時計度而



鈎考之一曰稽考簿以循環簿所書一歲徵收之數分記而總結之亦按次月日備書於冊一送部一存關一自收執親填簿循環簿於歲終繳部稽考簿於任滿繳部由部覆覈之以待奏銷

凡商販米穀往被災地方售價者所在官司給照過關毋許羈畱及各省鼓鑄銅鉛官倉營汛所糴米穀驗其文符並免輸稅

凡開稅考成監督一歲差滿條析經徵之數具  
疏專達其隸督撫總理者歲周疏報亦如之皆  
以冊達部受其要而會之定其殿最以

聞惟開隸工部者賦輸部庫考覈則由工部

欽定大清會典卷十六

欽定四庫全書舊要卷八千二百四十六 史部

欽定大清會典卷十七

戶部

雜賦

周禮山澤之賦供之大府金玉錫石之地什人  
守之歛布總布質布廛人歛之蓋利用通財而  
薄徵之以便民也前代以來雜賦繁重

國家寬政頻施復除殆徧矣惟其治於有司者繫

之賦籍俾在官者有稽焉

凡瀕江沙淤成洲之地小民植蘆為業或治阡陌種麥稻與良田等均曰洲田其輸賦於官均曰蘆課以乾隆十八年奏銷冊計之江蘇安徽江西北湖湖南所屬蘆洲共七萬九千九百四十六頃四十六畝賦入十有九萬八千二百五十兩三錢各有奇○蘆洲夾大江兩岸沙隨水性遷移不常此落彼淤民以聞於官州縣官隨

時親勘以申布政使司達於巡撫備書之籍閱  
五年巡撫選道員廉能者按籍履畝而覆覈之  
辨其坍於水者除賦水落沙長者分年起徵以  
方田之法度其丈尺周知其坍長之數而徵除  
之○徵除之法以新淤之地補其坍者如有餘  
地別給民工築其隔江對岸地分兩屬則令所  
治牧令會勘酌其盈縮以定抵補之數有不以  
實者官劾民論如律○清釐蘆洲以歲十月水

涸為始次年四月竣事巡撫疏

聞下部部受其要而覆覈之其報竣逾期者論○蘆  
課之徵各隨其地之宜以定輕重之等其分隸  
兩江湖廣者各制上中下三則冬時開徵至次  
年歲終迺綜其簿籍而申於部民有逋負者經  
理之官論

凡山鄉宜茶之地土人樹藝為業者無徵惟商  
賈轉運而售之民者徵其商曰茶課○權茶之

法由部頒引州縣官暨茶馬司

甘肅五司以道府同知兼之

批驗茶引所

江蘇設大使一人

受而布之商商採茶於

山及經過關津居積待售於各府州縣運行於

邊界土司皆憑引以為信無引冒行者為私茶

私茶之禁與私鹽同○茶引之頒於各省者江

蘇安徽江西浙江湖北湖南陝西甘肅四川雲

南貴州歲行三十六萬四千九百四十有九已

行之引由所司照驗截角更頒新引○茶課之

專入奏銷者陝甘歲徵銀六千二百六十六兩

有奇茶十有三萬六千四百八十篋

十斤為篋

四川

歲徵銀五萬九千七十兩有奇商有逋負者經

理之官論若江蘇安徽浙江所屬茶課由經過

關津驗引徵收歸入關稅江西湖北湖南及貴

州仁懷一縣歸入雜稅雲南歸入田賦其他直

省不產茶及雖產茶不頒引者皆聽民販運賦

歸關市不列茶課○陝甘茶商受引於本省市



茶於湖南回經河南由陝州照驗出關均不徵課惟行於陝甘有徵其所賦篋茶初制於邊外互市以易番馬後停易馬之令所賦篋茶貯庫發售○四川茶引行於內地州縣者為內引行於沿邊者為邊引行於土司者為土引其賦入不同各酌土俗之宜以定其徵輸之等

凡五金之產為器用所必需其藏於山巖土石之中者曰礦小民入山開採以資生計有司者

治之因賦其什一曰礦課○廣西雲南貴州產

黃金白金赤金錫鉛鐵水銀丹砂雄黃山西四

川廣東產赤金錫鉛鐵湖南產赤金錫鉛鐵水

銀丹砂雄黃皆召商試採礦旺則開竭則閉各

省賦入視出產之衆寡歲無常數○深山窮谷

資斧不能繼及近民墓宅田地均不開採承商

鳩工必用土著辨姦良四方客民走集者禁爭

訟滋事者禁以牧令丞倅掌其戒令戍之弁兵

以防姦宄其經理之不善者論如法

凡澤國多魚其漁者有稅曰魚課明代多設河泊所大使以幾其徵

國朝弛澤梁之禁惟畱江西二所廣東三所餘皆裁革歲課江南江西福建浙江湖廣廣東共二萬四千四百十有二兩有奇

凡民間賣買田宅皆憑書契納稅於官以成其質劑曰契稅○稅契之法布政使司作契帖鈐

以司印頒之州縣民之賣買田宅者領契帖於  
官徵其稅書其姓名揭其物數並原契予之以  
防詐偽以治訴訟其稅輸藩庫布政使司覆覈  
之以達於部歲無常數

凡城廂衢市山場鎮集舟車所輳貨財所聚擇  
民之良者授之帖以為牙僧使辨物平價以通  
貿易而稅其帖曰牙稅質庫商行操奇贏以逐  
利者有行鋪稅牲畜之鬻於市者防其暴盜有

馬牛稅豬羊稅水陸之珍自遠至者有落地稅  
若夫閭閻旗亭日陳百物販夫販婦擔負奇零  
皆無徵其徵於有司者歲終則會與田賦合疏  
以

聞以乾隆十八年奏銷之數計之直省歲課共百有  
五萬二千七百有六兩有奇

欽定大清會典卷十七

欽定四庫全書薈要卷八千二百四十七

吏部

欽定大清會典卷十八

戶部

俸餉

凡頒祿親王歲支俸銀萬兩世子六千兩郡王  
五千兩長子三千兩貝勒二千五百兩貝子千  
三百兩鎮國公七百兩輔國公五百兩一等鎮  
國將軍至奉恩將軍凡十有三等祿自四百十

兩每降一等減二十五兩宗室雲騎尉八十五

兩授雲騎尉品級者八十兩○固倫公主四百

兩和碩公主三百兩郡主至鄉君凡五等祿自

二百五十兩遞減三十兩固倫公主額駙二百

八十兩和碩公主額駙二百五十兩郡主額

駙二百三十兩縣主額駙百八十兩郡君額駙

百五十五兩縣君額駙百三十兩鄉君額駙百

有五兩○一等公七百兩二等公至雲騎尉凡



二十五等祿自六百八十五兩遞減二十五兩  
恩騎尉四十五兩不入等次之公侯伯子男及  
授輕車都尉騎都尉雲騎尉品級者自二百五  
十五兩遞減至八十兩亦以二十五兩為差○  
在京文職八旗武職一品官百八十兩二品百  
五十五兩三品百三十兩四品百有五兩五品  
八十兩六品六十兩七品四十五兩八品四十  
兩均正從同祿九品三十三兩從九品三十一

兩各有奇未入流與從九品同筆帖式七品三十三兩八品二十八兩九品二十一兩文職於正俸外加增一倍曰

恩俸又一品至九品月給銀五兩至一兩有差曰公

費

每銀一兩折制錢九百文

○祿米自王公至文武官弁均

以俸定數每俸銀一兩支米一斛○

盛京五部及

陵寢文武各官俸銀與京官正俸同○王公公主額駙

領俸以旗冊呈宗人府滿世爵暨文武官由本  
旗漢文官由本部院冊送吏兵二部覈實咨部  
歲以春二月秋八月給發○外文職自一品至  
未入流頒祿與內文職正俸同○中外綠旗武  
職正一品歲支俸銀九十五兩從一品八十一  
兩正二品六十七兩從二品五十三兩各有奇  
薪銀均百四十四兩三品俸銀三十九兩薪銀  
百二十兩四品俸銀二十七兩薪銀七十二兩

五品俸銀十有八兩薪銀四十八兩六品俸銀十有四兩薪銀三十三兩各有奇正從相同七品俸銀十有二兩有奇薪銀與六品同○

京營綠旗武職領俸由步軍統領冊送兵部覈實咨部給發外省文武各官冊送布政使司給發○外藩喀爾喀杜爾伯特等汗科爾沁親王歲支俸銀二千五百兩俸幣四十各親王均銀二千兩幣二十有五世子銀千五百兩幣二十科

爾沁扎薩克圖郡王同各郡王均銀千二百兩  
幣十有五長子銀八百兩幣十有三貝勒同貝  
子銀五百兩幣十鎮國公銀三百兩幣九輔國  
公銀二百兩幣七扎薩克台吉等銀百兩幣四  
下嫁外藩固倫公主銀千兩幣三十和碩公主  
銀二百兩幣十有二郡主銀百五十兩幣十縣  
主銀百兩幣八郡君銀五十兩幣六縣君銀四  
十兩幣五鄉君銀三十兩幣四固倫公主額駙

銀三百兩和額公主額駙銀二百兩均幣九郡  
主額駙銀百兩幣八縣主額駙銀五十兩幣五  
郡君額駙銀四十兩幣四縣君額駙銀三十兩

幣三

乾清門一等台吉銀百兩二等八十兩三等六十  
兩四等四十兩子男輕車都尉騎都尉雲騎尉  
視八旗世祿減半授達爾漢號者銀二十兩幣  
四八品官俸祿同均由理藩院咨部歲終給發

凡兵餉

京師八旗前鋒軍親軍護軍領催弓匠長月支餉  
銀四兩驍騎弓匠銅匠三兩均歲支米四十八  
斛步軍領催二兩步軍一兩五錢鐵匠一兩至  
四兩均歲支米二十四斛礮手二兩歲支米三  
十六斛由覺羅充前鋒軍親軍護軍者加一兩  
教養兵一兩五錢馬駝芻牧月給銀三兩出牧  
之月停支均由本旗佐領具冊申都統覈實咨

部按月給餉按季給米閏月如之○綠旗巡捕

三營馬兵月支銀二兩步兵一兩米均三斗馬

月給豆草銀二兩五錢由本營將備具冊申步

軍統領覈實咨部給發○直省駐防八旗兵餉

月支銀二兩米二斗五升馬月支豆九斗至七

斗五升草四十束至三十束各有差礮手月餉

二兩弓匠鐵匠一兩水手修船匠一兩至二兩

有差均由該旗冊送布政使司申督撫咨部豫



年撥本省正賦給發惟

盛京

陵寢及上駟院馬駝牧羣內務府牛羊牧羣太僕寺左  
右兩翼牧場並熱河古北口圍場各官兵均由  
部給發○直省標營兵餉馬戰兵月支銀二兩  
步戰兵一兩五錢守兵一兩均月支米三斗馬  
冬春月支豆九斗夏秋六斗草均三十束由標  
營冊送布政使司申督撫咨部如前撥給

凡優卹俸餉王公薨逝無子襲封者親王郡王福晉歲給銀千五百兩貝勒貝子夫人五百祿米如之公將軍夫人給夫俸之半咸終其身有子未襲封者鎮國將軍以下給半俸一年宗室無官爵者十歲以上月給銀二兩年至二十者三兩覺羅年至十八者二兩孤子不拘年限宗室給三兩覺羅給二兩均銀一兩支米一斛八旗世爵年幼未入朝班及年老休致未承襲者

均給半俸歿後無子襲封者給母妻半俸以終其身內外文職一品官

予告歸里者請

旨給以全俸武職一二品因老病乞休奉

旨以原官致仕者所司上其軍功或給全俸或半俸請

旨定奪三品以下武職乞休曾出師受傷及得有功牌者給以全俸但經出師者半之八旗兵丁年

老告退無親族可倚者月給銀一兩曾出師得  
有功牌者銀一兩米一斛官兵已故其妻守節  
者視其夫應得俸餉之半伙助一年其夫曾出  
師得功牌者全給之陣亡者歲給俸餉之半竣  
其子入伍支餉足抵歲給之數而止

欽定大清會典卷十八

欽定四庫全書舊要卷八千二百四十八

吏部

欽定大清會典卷十九

戶部

蠲卹

古者以保息養萬民歲有不登則聚之以荒政  
國家頻賜天下租稅鰥寡孤獨者有養其保息斯  
民者至矣一方告饑百出其道以拯救之荒政  
於是乎詳焉所以有備無患而民不失其所也

凡保息之政十一曰賜復

國家府修事和屢豐既告務本節用繁費不興於是

德音時沛賜復天下一年計地之遠近以為先後凡三年而徧蓋曠典也至於卹民之艱或免新或除舊

省方所至或賜半或賜全均由部遵

諭速行使生民共食昇平之福○二曰免科江浙財

賦甲天下前代以來賦浮於田小民困於輸納殊恩疊沛命有司覈實先後免江蘇正賦共六十五萬浙江正賦共十有二萬七千七百兩有奇民力以紓其他直省賦浮於田者報墾升科不實者山側嶺畔闢地奇零者江渚河洲海墻田圯於水者利興於山藪旺竭不常貨集於關津往來靡定者以及叢雜之課累積於因沿科歛之條弊生於豪猾者稽其賦稅雖載在地官之籍

悉與豁除○三曰除役城郭宮室橋梁道路河渠墉防凡有大興作皆出公帑計工授直古所謂力役之徵並弛之官司所涖公私差遣則有水陸舟車廨署需用則有厨匠薪蔬吉嘉典禮則有采章服物或出自公帑或取給養廉自昔里甲之供億商行之承直一切報裁○四曰振斂獨設養濟院以居窮民無告者自

京師以逮直省皆有養也土著之民願入者收之



如流落異鄉視其年尚能歸籍者詢其里居移  
文本籍收養其不能歸籍者察實隨在收養歲  
給銀米冬衣棉布各有差民有力者能出財伙  
助為嘉獎以勸之道府以事至所屬州縣必親  
為巡視如屋宇不修事廢弛者胥役侵漁者經  
理之官劾道府容隱並論如法○五曰養幼孤  
京師廣渠門設育嬰堂收養嬰孩之遺棄者給庫  
帑立產歲收租息以供乳哺之費順天府尹覈

其實而支給之直省則有司經理倡好義之民以廣其惠濟擇良善為衆所信服者董其事所收嬰孩識其年月日時及長有願收為子孫者登諸籍而予之其本家有訪求者歸之○六曰收羈窮五方之民多聚

京師有貧病無依者五城各設棲流所以收養之日給錢米有差隆冬酌給棉被所傭一人扶持之病故者給棺以瘞標識其處以待其家訪尋

者其費由部開支冬十月至春三月五城設廠  
為飯以食羈旅行乞者其米由通倉開支巡城  
御史督兵馬司指揮舉行左都御史左副都御  
史親省視之廣寧門外設普濟堂貧給飲食病  
有醫藥沒為歛瘞起於紳民好義者捐設歲頒  
崇文門稅銀千兩京倉米二百石以倡率之○  
七曰安節孝婦女矢志守節養舅姑撫遺孤者  
或貧無以自存命有司察訪給糧以養之俾有

所依賴歲終以支給之數具冊達部○八曰卹  
薄宦直省丞簿以下罷官回籍者資斧維艱給  
以道里之費身故給以歸喪之費學官距本邑  
五百里外者回籍亦如之歲終部綜直省支給  
之數覆覈之具疏以

聞○九曰矜罪囚民罹罪繫圜土饑寒切膚命司獄  
者體卹之自刑部以逮直省按察使司府州縣  
獄每囚日給食米鹽菜隆冬給棉布襦袴歲終

具冊送部稽覈○十曰撫難夷外洋夷民航海貿易猝遇飄風舟楫失利幸及內洋海岸者命督撫飭所屬官加意撫綏賞給糗糧修完舟楫禁海濱之人利其資財所攜貨物商為持平市易遣歸本國以廣柔遠之恩

凡荒政十有二一曰救災川澤水溢湮田禾漂廬舍有司即率衆救濟申報上官視所壞民居辨其為茅苫為甓甃給修理費各有差有傷人

者加卹之督撫立與施行具疏以

聞有怠玩需遲致民衆流離者惟督撫之臯○二曰  
拯饑水旱成災督撫疏

聞即行撫卹先給饑民一月糧以免待哺迺察被災  
之輕重及民之極貧者與其次貧者除撫卹一  
月外被災六分者極貧予一月糧被災七分八  
分者極貧予兩月糧次貧一月被災九分者極  
貧予三月糧次貧兩月被災十分者極貧予四

月糧次貧三月每戶計口日授米五合幼弱半  
之如米穀不足則依時價以銀代給州縣官親  
為省視極貧之外凡乏食者皆作次貧毋許遺  
漏具籍申府司巡撫以達於部豫為文告列戶  
口姓名首力農者次游手無藝業者書其發粟  
散財之數與日月次第使民周知頒之票以為  
信以防牙儉之冒領轉售者設廠城中必當四  
履之中鄉村則視居人稠集之地集待振之民

於廠成戶者給以米一月一發糶獨不能自舉  
火者為粥以食之每日一發饑民赴廠者男左  
女右老弱先壯者後其自遠鄉來赴者令就食  
於廠方冬為謀棲止及春和而後遣還寒士則  
學官具籍牒州縣官移粟黌舍就給以別於齊  
民胥吏楮墨諸費官為齎發以杜其需索若災  
出非常督撫特疏以

聞則因時因地而量度之或於極貧加至五六月七



八月次貧加至三四月五六月不拘常格有不盡心撫字及胥吏侵蝕致澤不下逮者論如法  
○三曰平糶穀賤傷農則增價以糶穀貴傷民則減價以糶倉名常平此常法也若歲或大饑有司先酌時價應減之數以報督撫覈定具奏即與施行設廠城中及四鄉示期出糶以濟民食其散糶之法與拯饑同如倉穀不足則動庫帑遣官告糶於鄰省再不足則截留漕糧以濟

之竣市價既平而止發倉儲者糴穀還倉動庫帑者易銀歸庫截漕糧者或增入常平或報部候撥皆因時酌定有經理不善者論如法○四曰貸粟或歉收之後方春民乏籽種貧不能耕或早禾初插夏遇水旱及既雨既霽民貧不能補種迺命府州縣開常平倉或社倉出穀貸之俾耕插有資以待秋熟其兵丁之貧乏者亦貸焉及秋視其收成之豐歉收成在八分以上者

加息徵還七分者免息徵還六分者本年徵還其半來年再徵其半五分以下者均緩徵以待來秋之熟若上年被災稍重初得豐收其還倉也亦準免息直省有向不加息者各從其土俗之宜

特旨本息均免者率視督撫奏請即與豁除○五曰蠲賦年不順成命有司察其實而蠲其租賦視被災之輕重以別其宜蠲之數被災十分者蠲

賦十分之七九分者蠲賦十分之六八分者蠲  
賦十之四七分者蠲賦十之二六分五分者均  
蠲賦十之一〇六曰緩徵如屢豐之後忽遇偏  
災雖民不重困而輸賦維難或積歉之歲舊負  
未償新逋又至迺緩其催科之期以寬民力被  
災八分以上者分作三年帶輸被災五分以上  
者分作二年帶輸均期至次年麥熟起徵若次  
年又無麥則期至秋收後徵之仍按其應緩之

年麥後遞緩至秋後其帶徵之數已多亦視督撫奏請

特旨均與豁除○七曰通商年不順成令鄰境毋過糴以通有無商旅販米穀赴市者開無幾詞市毋減價俾聞風輳集東南夷國島嶼大者地多產穀頻海諸省舳客出洋貿易者令其歸舶載米為減稅以招徠之歲豐穀賤則復其舊○八曰勸輸縉紳士民有敦任卹之風者遇歲之不

登或輸粟或輸銀糴穀或助官拯饑或依官價減糴或利及族姻或施及鄉里由州縣而府而司道而督撫為表其閭視所輸之多寡以為差等過二三百石者以聞於

朝官予紀錄民予品銜以旌獎之○九曰嚴奏報之期州縣官遇水旱即申知府直隸州布政使司達於巡撫巡撫具疏以

聞夏災不出六月秋災不出九月愆期及匿災不奏

報者論如法巡撫疏聞下部部行覆勘逮其察  
實請拯也以四十五日為期其報可舉行造冊  
達部也以兩月為期逾期者論至督撫奏報水  
旱每降

旨先事綢繆則較具疏部覈之期更為迅速○十曰  
辨災傷之等為水為旱為風為雹為蟲各有輕  
重夏災既告如晚禾可種及田有一歲再熟者  
俟秋熟既獲再定其分數若夏種秋收之田災

後不及晚耕者則不竢秋後即以成災論秋災  
既告督撫委鄰邑官會本邑牧令履畝親勘辨  
其成災五分至十分以別其為蠲為緩之宜及  
拯濟多寡之數疏聞即命舉荒政之宜行者速  
布於民其受災重者或


特命廷臣或該督撫經紀其事未及分數者雖不成  
災亦省視民力以酌行緩貸之政○十有一曰  
興土功使民就傭歲饑有力之家皆罷興作閑



民轉移任執事者生計益艱迺命有司相時地  
之宜庀材鳩工或築城垣或濬溝渠或固隄防  
或治倉廩俾廢墜可修而民就傭賃得食以免  
於阻饑事竣則疏報所濟饑民與所費工築之  
數由部覆覈而奏銷之○十有二曰反流亡使  
民生聚郡邑猝被災祲州縣官曉示百姓毋得  
遠行覓食輕去鄉土即給一月糧以撫安之其  
已出在外者所在有司勸諭還鄉以就拯貸老

弱被疾者暫為畱養春和遣歸欲歸無力者計其費資給之

欽定大清會典卷十九



總校官候補中書臣吳紹潔

校對官檢討臣王鍾健

謄錄監生臣張賦京